

1 CROONICAS 28-29

Coteenu Croonicas Naajioneer

Salomoon sanitishacari
na que David

28 ¹Camarnu Davidri Jerusalem tiacajinia puetunu nio pojori narta Israel pueyajinijiniojuanaa rerejotequiaari: niquiriyatu jiyaniijia puetunu Israel doce maapuejinijiniojuanaa, puetunu miaquetoohonuucua puerojonaa jiyaniijianucua juhuaj, miaquetoohonuucua mil pueya puerojonaa jiyaniijianucuanio, miaquetoohonuucua cien pueya puerojonaa jiyaniijianucuanio. Naajuhuaaj, camarnu Davidri nera cuhuariquiaca cuhuorojonaa pueya jiyaniijianucua rerejotequiaarijuhuaj, na juyaca cojuanaa jiyaniijianucua juhuaj, puetunu necohuarajanaa cuhuorojonaa, na juyaca cojuanaa jiyaniijianucuaajanio. Puetunu narta camarucua tojishano pueya rerejotequiaarijuhuaj, naajuhuaaj socua cumaacaraca miaquetoohonu niishijiaca na pueyajaajanio.

²Jiyacaritij, camarnu Davidri narta pueya tacoji nujuaree. Naa nojori sequereeri:

—Quiarijia cua tojitiuri cuarta pueya cua panishano cua jiitiasano pueyanaa. Tariucuaanujiniji janiyari niishiriojoriquiaani maninia juhuari cua tiatenura

pueyaracaanu pa Pueyaso quijia cojee cojitajara tii. Cuno tia maara quiri pa Camarnu Pueyaso quijia tii pueyaracaanu. Cuno cojee cuajaari maja pa niyajetanura pa tojishocoriquiano pa Pueyaso sequesano. Tariucua paatijiosano jiitiaa casaanijia nocuajinio tiatajara.

³Saniniuujia, Pueyasoori naa cua sequequiaaritij: “Cunoori maja quiajaninya, cua quiquiora tiariquianoni. Quiaari coonu. Quiaari queraatia pueya nanaca shooteno.” ⁴Naajaa, supuetana Israelcuajinio caneno pueya pa Pueyasoni, nojuajaari cua tapueyocuaca tajiniji cua saquiriojono pueyaracaanu parta Israel pueya camarnu cua quiniuria. Pueyasojuanaacuaajaari supuetana Judaacuajinio caneno pueya saquiriojoriquiaari puetunu parta Israel pueyajanaa camarucua nojori quiniuria. Naa supuetana Judaacuajinio caneno pueya na saquiriojonuucuatej, cua queeri na saquiriojosano quiriquiaa. Saniniuujia, puetunu cua que niquiohuajinijiniojuanaanij, saa janiyajaari na saquiriojosanoni puetunu pa supuetana Israelcuajinio caneno pueyajanaa camarnu cua quiniuria.

⁵Quiarijia saniniuujia, janiyari queraatia niquiohuaracani. Puetunu nojorijianaari Pueyaso niquitiosano janiya. Puetunu nojorijinijiniojuanaanij,

Pueyasoori quiyanu Salomoon saquirio-joree cua niti camarnu quiriquiano. Naacuatej nojuacuajaari pa Camarnu-juanaa jiyatesano parta Israel pueya jiitiriquiano Pueyasora. ⁶Pueyasoori naa cua sequequiaarijuhuaj: “Quia niyanu Salomoonni, nojuaja cutaraari cua quijiarano tiariquiano, cua quiquio matoriquianojaariuhuaj. Janiyari juhua quiyanuraja na saquiriojononi. Janiyajanaari na que quiriquianoni. ⁷Naajuhuaj, camarnu na quishacari, Salomoon jaara seetanujuanaa tama na cuaqueyajaaja cumaquiri puetunu cua sequesanojanaa miiija na quiniuria, taa quiarijia na miyacuajanij, nojuajaari sanitiyaquishoo quiriquiano. Janiyari pueyaracaanura camarnu na jiyateriquianoni.”

⁸Quiarijianij, niya rerejono pa supuetana Israelcuajinio caneno pueyanaa, janiyari Pueyaso niquiara seetanujuanaa nio nia sequeyani: Seetanujuanaa puetunu niaarano Pueyaso sequesanojanaa tojiijia nia quiriquia. Nojuajaari nia Pueyasocuaaja. Niaa jaara na sequesano miiijia quiri, nio jiya maniniu niaa tii quiyanij, nioori naacua pueyaracaanu nia jiya quiriquiano. Nia shaajecosacarijuhuaj, nio jiyari nia niquiohua noquiyara quiriquiano pueyaracaanu saniniuuja. ⁹Quiajaniya saniniuuja quiyanu Salomoonnaa, seetanujuanaa quia que cojuana Pueyaso niishijia quia quiriquia. Seetanujuanaa quioojiajinia nojuaja quia paniniutia shitimia quia miiriquia puetunu neranojanaa. Pueyasocuaajaari puetunu pa niishiriojotajajinia pa niishiriojosano niishijia. Naacuatej, nojuajaari maninia pa niishiriojosano, sacuaraatia pa niishiriojosano niishiya-cuaaja. Nio cua sequesanoori seetanujua-naa. Naacuatej, quiaa jaara Pueyaso paniri quia naacuriquiano, nojuajaari

quia naacunutaniya. Saniniuuja, quiaa jaara na shocotere, nojuaja cutaraari quia ruuretariquiano tojetaarucujanaa.

¹⁰Quiarijia quia niishiri cutara, Pueyasoori quia saquiriojoree nera na quijiaa tiariquiano. Naacuatej, tama quia cuaqueyajaaja quia cumaquiri. Quioojia quia cumaquiri. Naacuatej quiarijia nocuaji quia tiare.

¹¹Camarnu Davidri jiyacari neyanu Salomoon niquitioree naajionee. Cuno naajioneejiniani, tiiri tariucua naajiosano quiriquiaa taateja Pueyaso quiquiora-no tiaco tiuquitiajara quiniutianiyani. Tii tariucua naajiosano quiriquiaajaariuhuaj, taamueca tiateja quiniutianiyani: casami racatajara sohuacaca, nataco rerejojua sohuacacajuahuaj, socua pueyamaanu tiajiniaaco

sohuacacajuahuaj, Pueyaso cojee quiquiorano sohuacanio. ¹²Camarnu Davidri jiyacari neyanu Salomoon sequeree puetunu na niishiriojosanojuanaa; Salomoon tucua taa Pueyaso secojojua tia jiuucuaaji nujuatejore tucuaqui juhua moriuijuacuaja saijinij casaanij. Na sequerejaariuhuaj cuaara pueyamaanu sohuacaca miiria Pueyaso secojojua tia shuucuaaji. Cuno sohuacacaari Pueyasorano pueya niquitiojosano cumaneeca racatajara, na casamijinijinio Pueyasorano pueya jiyatesano racatajarajaariuhuaj.

¹³Naajuhuaj, Davidri Salomoon niquitioree tariucua naajiojuhuaj maatucua taamueca sohuacaca miirini nio pojori quijiaa: pueyacuara secojona, supuetana Leviicujajinio caneno pueyajuhuaj nojori sanitijotoosacari Pueyaso Secojojuajinia nojori poonijiosacari, socua tamonu sohuacajuahuaj puetunu Pueyasora catijiasacari manijinia pueraquetaja casami racatajara.

¹⁴Camarnu Davidri jiyacari neyanu Salomoon niquitioree queraatia oro,

queraatia platajaanio. Cuno oro plataari Pueyaso secojojua tiajiniaaco nujuatacoriquiano Salomoon jeecojotesocoriquiano quiriquiaa.

¹⁵Cuno oro plataari nio casamiriano quiriquiaa: Pueyaso secojojua tiajiniaaco nujuaretasocoriquiano pueyamaanu cashacucuaraca noshiquioriquiano casaa. Cuno casamiiri orojiniji platajiniji shipinijosocoriquiano quiriquiaa. Naacuatej, Pueyaso secojojua tiajiniaaco nujuatacoriquiano oroori tariucua na niiquia shanacujusano quiriquiaa. Camarnu Davidri tari niishiriquiaa taa niiquia puetunu cuno casamijianaa jiitianutaniyanij, jaara tariucua jeecojosano quiri. ¹⁶Camarnu Davidri socua oro platajaaja niquitioree pueyamaanu miaqueja casaa jeecojotajara. Cuno miaquejaari Pueyasora jiyatesano jatiqui niaretasano pan niojojuara quiriquiaa. ¹⁷Naajuhuj, camarnu Davidri socua oro niquitioree neyanu Salomoon, puetunu nio casamijanaa na jeecojonura tiji. Plata niquitioree naajaariuhuj. Naacuatej, nio casamiiri oro, platajiniji jeecojosocoriquiano quiriquiaa: pueyamaanu juhua camatano cashacu niquishano, naseecajinia pueraquetaja casaa; pueyamaanu ratutaja suhuocorau; pueyamaanu na shuucujaji cashacucuaraca shiirijiaa patacocuajuhuj; queraatia shiirijiaa ratutaja casaajaanio. Puetunu nio casamijianaari orojiniji platajiniji miishocoriquiano quiriquiaa. Oro niiquiaari naacua maninia shanacujusano quiriquiaaquij, puetunu nio casamiicujanaa puecojosocoriquiano. ¹⁸Na queeri socua oro niquitioree Salomoon. Cuno oroori tariucua curuutuucaju quiriquiaa. Naacuatej, saa jiyanojaari quiriquiaa cuno oro. Cuno oroori shanohua

jaanutaja catijiaja juhuacuturano quiriquiaa. Salomoonri oro niquitiosaareejuhuj, nesuhuaraca juhua pueyano niquishano casaa jeecojotajara. Cuno casaari Pueyaso quijia cojee caco teecojua.

¹⁹Puetunu camarnu David seeratasano neyanu Salomoonni, puetunu cunojua-naari naajiotasano quiriquiaa. Cuno naajiojiniani, Pueyasoori tii sequequiaari taa puetunu casaajanaa nojori miiniutianiyan. Pueyasocuaajaari David niquitiquiaari maatucua taa puetunu cuno casaajanaa jeecojoreni.

²⁰Camarnu Davidri jiyacari neyanu Salomoon sequeere: “Quiarijia quioojia quia cumaquiri. Maja taacanunu. Ritia quia coteere poonijionu. Majaari na miiniu tarinitianu. Majaari puerenujuhuaj. Cua camarnu Pueyasocuaajaari quia cojiriquiano. Nojuacuajaari quia naacunutaniyajuhuj quiaa cuaara tucataara tianu Pueyaso secojojua tiajaatijia puetunu na casamijianaanio. ²¹Niya quiyacuajaari Pueyaso secojojua tiajiniaaco cojecoriquiano pueya. Nojoricuajaari supuetana Leviicujainio caneno pueya, cuno poonijosano miiriquiano Pueyaso secojojua tiajiniaaconi. Poonijioriquiano queraatia pueyacuajaari niya quiya. Nojoriiri queraatia poonijosano casaa miiniu niishijiacacuaja. Naajuhuj, puetunu nio pueyajinijinio jiyaniijanucujanaari quia tojitiuriquianocuaja puetunu pueyajanaanio.”

29 ¹Na nuhuaji, Camarnu Davidri na tojinuucua rerejono pueya sequeere naatej: “Nio quianu Salomoonni, Pueyasoori saa nojuaja saquiriojoree camarnu quiriquiano cua niti. Nojuajaari naatujuaja, na miishocoriquianoori jiyanoehua queraatia saniniuujia. Cuno na tiasocoriquiano tiani, cunoori maja parta pueyano

tiarano camarnu na quiniuucua. Sequeshiyacuajaari Pueyaso secojojua tia, pa Camarnu Pueyaso quijiarano riuriotaca naatej. ²Janiyari naacua cua Pueyasooctuaji tiatetajara puetunu cua cumaacatajanaa тариуца паатийосано иитиаа орон, plata, bronce, cumueeca casaa hierro jiyanihanonio, juhuanacajuhua puetunu casaajanaa jeecojotajara; naajuhua, jyanohua panishano cornalina jyanishano saijaajanio, sereretuuca sairi, naajuhua, jyanohua panishano sai, muerujuaaca saijuhua, juhua sojotasano sereretujuaaca sainio, naajuhua, socua queraatia tamaatiujiaaca saijuhua, jyanohua queraatia alabastro jyanishano sainio. ³Naacuatej Pueyaso secojojuarano tiataracuaajaari тариуца паатийосано қиуа. Naajaa jyanohua cua paniniuucua cua Pueyaso secojojua tia, janiyari tama cua jiitiasano oro platajaaja niquitioyani. Cunoori tama cua casaajaaja cutara. ⁴Cua niquitiosano oroori cien mil kilo jiitiaa. Cunoori oro maniniu. Cua niquitiosano plata niiquiaari doscientos treinta mil kilo. Cuno plataari secojojua tia jiniacuma sohuaca nucutajarano. ⁵Naacuatej cua niquitiosano oro plataari тариуцаја пуетуну casaa jeecojotajara. Naacuatej juaashiquiaraca pueyari tari jiitiaacuaja puetunu nojori panishano oro platajanaa puetunu casaajanaa nojori jeecojonura. Quiarijia saniniuujia ¿Teyonu niajanijajinijiniteja na jiitiasano casamijini nareja Pueyasora niquitioyoni panianijia?”

⁶Jiyacaritij puetunu Israel pueya jiyasohuajanaari tama na jiitiasano cumueeca casaajaaja niquitiojoquiaari nareja. Naajuhua, supuetana Israel doce niquiohuacuajinio caneno maapue jyanijianucuaari niquitiojoquiaarijuhua. Naa

niquitiojoquiaarijuhua miaqueto-
jonuucua mil pueya puerojanaa
jiyaniijianucua, miaquetojonuucua
cien pueya puerojanaa jiyaniijianucua-
juhua, puetunu camarnu Davidra
poonijionaa pueyajaajanio. ⁷Naacuatej,
puetunu cuno pueyajanaari queraatia
cumueeca casaa niquitiojoquiaari
Pueyaso secojojua tiatarajara.

Quiriquiaari ciento sesenta y cinco mil
kilo oro, socua тариуца shipinijosano
diez mil cumaneeca oronio.

Quiriquiaajaarijuhua trescientos treinta
mil kilo saa plataja. Naajuhua,
quiriquiaari quera seiscientos mil kilo
bronce. Quiriquiaajaarijuhua tres
millos trescientos mil kilo saa hierroja.

⁸Naajuhua canaputeja jyanohua
panishano sai jiitajaca quiquiaarini,
nojori Pueyaso secojojua tiatarajara
reratena na niquitioyoni. Pueya
niquitiosano cojuanani, nojuajaari
Jehiel jyanishano quijia, supuetana
Guersoon niquiohuacuajinio pueyano.

⁹Naa juhua capora pueya niquitioyoni-
cua na jiitiasanojiniji seetanujanaa
nojori paniniutatej, tama nojorijiaarijia
jyanohua timiquioquiaari. Camarnu
David na timitiaquiaarijuhua.

²⁰Camarnu Davidri jiyacari na tojinuu-
cua rerejono narta pueya sequequiaari
naatej: “Quiarijia Pueyaso nia timitiare, nia
Camamujanaa nojuaja quiniuucua.”
Jiyacaritij, puetunu tii rerejono pueyajanaa-
ri nojori supuetanaa Pueyaso maniniuhua-
quetaree. Puetunu pueyajanaari Pueyaso
na timitianura na tajoji mojuquetacoree,
camarnu David tajoji
mojuquetacoreejaarijuhua.

Camarnu David shaajesacari

²⁷Camarnu Davidri cuarenta marijia
shocotejoquiaari narta Israel pueya
camarnu na quishacari. Coteenu siete
marijia shocotejoquiaari Hebron

tiacajiniaari, na nuhuaji socua treinta y tres marijia Jerusaleen tiacajinia.

²⁸Camarnu Davidri tojetaarucuajanaa piquia shaajequiaari. Tariucua queraatia marijia shocotejonoori nimishiquiaari.

Nojuajaari jiyanoehua casamiriaca quijia, timitiasano quijiajaariuhuj. Neyanu Salomoonri na niti tacaquiaari na cajitiujinia saniniuujia camarnu na quiniuria.